

Yakobo

Ɔwulú

Itsiáha

1 ¹Mí Yakobo ání ngyi Bulu mva aní Wíe Yesu Kristo osúmbi dé Ɔwulú ání wanlín sísí mli Bulu ahá^a ání mluladásáin wá ɔyító fée. Nde mli itsiá ha.

Ansigyínya Ukplántɔ

²Apíó aba, ní mlowíe ukplán mva asun wunhetɔ á, ansí ihíe gyi mli. ³Tsúfé mliyin ání ní bɔɔ mli hógyi ki a, itehá mltotomi tálí líí mli asun wunhe fée ɔnɔ. ⁴Ní mletálí tomi líí mú ɔnɔ á, íbéha mlédan, wá alé, fún tógyítótó. ⁵Ní mltɔ ɔku léhián nyánsa á, ɔkúli Bulu. Ɖbéha mu faan. Ɖmóɔwa mu péltɔ, tsúfé Bulu tɔpú awitɔle há ahá fée nyánsa. ⁶Táme ní fókulí mu a, pu hógyi kuli mu. Másusúu fée ɔmééha fú. Tsúfé ní fumohogyi ání ɔbéha fú á, fugyi fé ɔpuá ídá yó nkpa, íladá yó ɔma. ⁷⁻⁸Ɖhá ání ogyi alí, mu agywun tamalíí tsukule ɔmádinká ansí ɔbéé, ménya tɔtɔtɔ tsú aní Wíe Bulu wá, tsúfé mu agywun igyi anyɔ.

Ohian Pú lwunya

⁹Ansí igyí Okristoyin ání ɔma tɔtɔ, tsúfé Bulu latsú mu fúá. ¹⁰Ní Bulu ɔbá wí onyapú é así á, ansí igyí mu. Tsúfé mu nkpa bótɔsun fé oyí ntswítswí. ¹¹Alí ámúú owí ɔnɔ íwá ɔnlín, ítɔ ífá, mú ntswítswí tɔbú kpákpáa; ífá ámu alé tetá ámu a, alí kén wí onyapú déyɔ ɔdebá alu obówu ní.

^a 1:1 Yakobo létí Bulu ahá ɔbéé, *abusuan dúanyɔ* ámu.

Isóki

12Bulu toyúlá chá ání ototomi ikplántɔ. Tsúfé ní ɔledali mótɔ́ á, Bulu ɔbéda mu ipán, há mu nkpa ání utamatá, igyi usugyí-ipa ámúbú ɔlehie ɔbéé, mópuhá ahá ámúbú butɔ́dwé mu amu. 13Ní bɔɔɔ ɔku kí a, ɔmáblí ɔbéé Bulu lásɔ́ mu kí, tsúfé cháa méetalí sɔ́ Bulu kí ɔbéé, ɔbwéé lakpan. Bulu é tamaso cháa kí ɔbéé, ɔbwéé lakpan. 14Nyankpusa onutó ɔwólí laláhe témlé mu, bítía mu wá usókitɔ́. 15ɔwólí laláhe tɔ́kwíí lakpan. Lakpan é igyi ɔhasu á, utɔ́pú lowu ba.

16Mú su apíó adwepú, mlumáha cháa ɔmle mli. 17Atɔ́ wankláán pú atokiehé yilé kugyíku itsú ɔsúsú. Itsú aní Sí Bulu, ɔsúsú atɔ́ wankíhé ɔbwepú ámu wá. ɔtamatsé fé ɔpa múa onyé. 18Mu apétɔ́ ɔɔpu mu ɔnɔ́kwali asún kwíí aní, méní abó́bwe agyankpavu mu atɔ́ bwehé féétɔ́.

Asónnu Pú Músúgyí

19Apíó adwepú, mlinu. Mlúkɔsi nu asún asi. Mli ɔnó máwa ɔsa. Mlumákɔsí nyá ɔbló́ é. 20Tsúfé ɔbló́ tamabwé tɔ́á Bulu tekle. 21Mú su mlile tsiátɔ́ laláhe kugyíku le mli nkpatɔ́, amlisi lakpan bwe. Mboún mlíba iwiasi, amlíhɔ́ Bulu asún ámúbú aladú wá mliɔ́ ámu. Mú ɔbéha mli ɔkláa obénya nkpa ní.

22Mlíbwe dínka Bulu asún ámusu, mlumábwe mú anupú keke. Ní mlɔ́bwé mú anupú keke a, iwí mludémlé. 23Chá ání onú Bulu asún, omegyí músú gyí fé chá ání alakí mu iwí ahuhwétɔ́. 24Onyánátí mú asi pé á, alatan alá olowun mu iwí. 25Táme chá ání ɔleyaa asu nú Kristo mbla ámúbú ulɔ́fun, utehá antegyí iwí ámu, ɔmetan músú, ɔde músú gyí a, Bulu obóyulá mu ɔkpagyíɔkpasu.

26ɔhagyíɔha ání ɔbéé mude Bulu súm, táme ɔtamakítá iwí mu tótɔ́ á, ɔde iwí mlé. Mu Bulusúm igyi kpaali. 27Bulusúm oduá mú iwí letin, asvansu ma mú iwí, aní Sí Bulu tekle gyí, mléki awumbi múa asvrapusu amú ikplántɔ́. Mléki ání ɔyí ánfítɔ́ lakpanbwe é iméegyí mliɔ́.

Fitátɔ Futí Kí

2 ¹Mí apíó, ní mlílahɔ numnyam Owíe Yesu Kristo gyi a, mlumáfutí fitátɔ kí. ²⁻³Ní iwí onyapúbá ɔdudí tatiá ibu ibiá, ɔlɔwa sika atɔ pú ohiániá ɔdudí tatida bebá mli Bulu osúmkpá a, mlímáha iwí onyapú ámu otsiákpá, bláa mu mliaa, obétsiá oyilékpá nfi; bláa ohiáni ámu mú mliaa, otsiá así ɔtunekv unv, ntée odúnka ɔtunekv lu. ⁴Ní mlobú ahá amú iwinya sv á, mlímókúpú agywun laláhe gyi asún ní?

⁵Apíó adwepú, mliyaa asv amlinu. Bulu léle ɔyi ánfítɔ ahiánfɔ ɔbéé, bunyáa hógyi ání mú ɔnɔ bu ɔnlun, abutsia mu iwíegyí ámutɔ, fé alí ámúbú ɔlehie yáí ɔbéé, mɔpohá ahá ámúbú butɔdwé mu amv. ⁶Táme mli mú á, mlitɔkpóí ahiánfɔ. Nfíte mli, megyí iwí anyapú ánfí tesísi mli, tswín mli mánsu, sáma mli wúlu ahande wá ní? ⁷Megyí amú dé Kristo idayilé ámúbú idin mlisu ámu kpóí ní?

⁸Bulu mbla ámu féé nwon, bɔwanlín wá Bulu asvn wanlínhé amutɔ gyí, “Dwe fú bá fé fú iwí.” Ní mlidé músú gyi lélé á, múmú mlidé itɔ wankláán bwe. ⁹Táme ní mlofúti fitátɔ kí a, mlilabwé lakpan. Bulu mbla ámu lahá mli ipón. ¹⁰Tsúfé fúá fegyí mbla ámu féésú, táme fepán kule pé á, fagyí pón ání fatún mbla ámu féé. ¹¹Tsúfé Bulu léblí ɔbéé, “Mátɔ mbua.” Mu kén léblí ɔbéé, “Mámɔ ɔha” é ní. Mú sv ní fvmókútɔ mbua, táme famɔ ɔha a, fvmókúkíná Bulu mbiasv gyí ní? ¹²Bulu ɔbɔpu mbla ánfí utehá anutegyí iwí ánfí gyi ahá asún. Mú sv mlíkí wankláán, mli asvn blíhé pú mli bwehétɔ. ¹³Tsúfé ɔhá ání ɔtamawun ahá nwe á, Bulu omóowun mu nwe. Táme ní futowun ahá nwe á, Bulu obóowun fv nwe mu asún ogyíké.

Hógyi Pú Bwehé

¹⁴Apíó aba, ní ɔku ɔbéé, mɔhɔ Bulu gyi, táme mu bwehé mosuná alí á, labi mɔmu mu hógyi amv bu? Mú odu íbétalí há mu ɔkláa obénya nkpa? ¹⁵⁻¹⁶Ní fowun fú aba aku buma atɔ didáhé pú ɔyi keheto atogyihe, táme

fumeha amú, febláa amú fee, “Nehá mli itsiá. Mlutsia wankláán. Bulu ɔkpáa mli, ɔha mli tśá ide mli hián” a, labi mɔmv fú asun blíhé amv ɔlɔwa? ¹⁷Alí hógyi igyi ní. Hógyi oduá yilébwe há fú bá uma mótś á, igyi hógyi wúhé.


¹⁸Ɔku ɔbétalí blí ɔbéé “Fubu hógyi. Mí é ntɔbwé yilé.” Néle bláa mv mbéé, “Suna mí fú hógyi amúy yilébwe uma mótś ámv. Mí é nósuná fú mí hógyi tsú mí yilébwetś.” ¹⁹Fú hógyi desuná ání Bulu ɔkule pé bu mv? lbu alé! Táme bu ání *ɔɛ laláhe féé bohogyi alí. Mú sv butenyá mv ifú, kpínkí kpakpakpakpa. ²⁰Fú ɔha mimláhe, fudekléá fówun ání hógyiá itamabwé yilé igyi hógyi kpaalí? ²¹Ani náin Abraham lóbwe yilé Bulu ansítś, tsúfé olotsulá kpá mv bi *Isak yáa pututś, teki ɔyómɔ mv bś afɔɔde há Bulu. ²²Mlilawun alí nanáin Abraham hógyi pú mv bwehé lenatí? Mv bwehé sv mv hógyi ɔɔfun. ²³Alí Bulu asun wanlínhé anfi ɔleba mótś ní. Ɔbéé, “Abraham lóhɔ Bulu gyi. Mú sú Bulu lóbu mv yilé ɔbwepú,” tí mv mv nyawie ni. ²⁴Íni sv séi á, mlibi ání yilébwe téhá Bulu totsú ɔha ání mv asún da ɔkpa mv ansítś, megyí mv hógyi pé.

²⁵Alí ɔleba ha obu-ɔnś otsiápú Rahab é ní. Bulu lótsu mv ání mv asún da ɔkpa, tsú tśá ɔɔbwe sv. Ɔɔɔpɔ *Yudafɔ akvá beba buɔe ansí wa ki mv ɔmátś ɛáin, ɔleha amú betse ɔkpa srí.

²⁶Alí amúy ɔɛ uma ɔhatɔ ógyi itowuhé ámv a, alí ní yilébwe memá hógyisu é igyi hógyi wúhé ni.

Ɔdandu

3 ¹Mí apíó, mli féé mlumábwe iwí atś asunápú. Tsúfé Bulu obégyi aní atś asunápú anfi asún kínkíínkín. ²Aní féé anɔpán brégyíbré, táme ní ɔku tamapán mv tótɔ á, múmú ɔɔfun. Ɔbétalí gyi mv iwísv ɔkpagyíɔkpasv. ³Apúkí, dátɔbi ku pé butɔpúwá ɔɔnɔkɔ ɔnś, púdámli mv, súná mv ɔkpa pú tśá ɔbwéé. ltehá otobú aní. ⁴Mlúki ntsusu-yibiá idun ntsu ansítś. Ilomoní, afú kpɔnkpɔnti tópú mú nátí. Táme ɔtabu pátáplábi ku tédámli mú, súná ɔtínéá iyɔɔ. ⁵Alí aní



*Dátɔbi kv pé butɔpúwá ɔpɔnkɔ
ɔnɔ, púdámílí mv, súná mv ɔkpa
pú tɔ́á ɔbwée. (Yakobo 3:3)*

ɔdandu é igyi ní. Igyi anɔ iwɔ
itɔ́ túkúríbí kv. Táme itetálí
blí asún akpɔnkpɔntɔ pútsú
iwɔ.

Igyi fé ogya plenplenbi ání
itɔwá ipú yílé ogyá. ⁶Igyi
itɔ laláheá iteyíntá atɔ́ féé
anɔ iwɔ. Itɔkpɔ́í nyankpɔsa,
yíntá mv nkpatsiátɔ́ féé.
Isɔbití ogyá ání itamaduntɔ
ɔdandu ogyá ánfɔ tetsánkí
tsú. ⁷Nyankpɔsa tetálí bwé
pututɔ-mbwi, mbubwi, awɔ
pú ntsutso mbwi akugyíaku
butemántá. ⁸Táme ɔhaa

mɔkútálí bwé ɔdandu ɔmanta kv. Itɔ laláhe ɔdandu gyí.
ɔtamatsiá díín. Elín ání itɔmɔ́ sɔ́n bɔ́ mú. ⁹Anitɔpú anɔ
ɔdandu kánfú anɔ Wíe pú anɔ Sí Bulu. Mú kén anitɔpúlwií
ahá nɔ. Táme Bulu onutɔ lɔ́bwe nyankpɔsa fé mv iwɔ. ¹⁰ɔnɔ́
kule pé ámutɔ ɔkanfú múa ulwí tedáli tsu. Mí apíó, uma aleá
ibéba alɔ. ¹¹Ntsuá ibu anúle pú ntsuá uma anúle bétalí lun
tsu ɔbún kuletɔ? ¹²Mángo oyí bétalí swíé kankaba? Ntée
baflé oyí bétalí swíé mángo? Ekekeke! Alí ntsuá ibu anúle
méetalí lun tsu ɔbún ání mótɔ́ ntsu ma anúletɔ ní.

Nyánsa Ání Itsú Bulu Wá

¹³Ní ɔkv bu nyánsa múa asún asinu mlitɔ́ á, múmú ɔpúv
mv tsiátɔ́ wankláán le mú suna tsun mv bwehé pú mv
iwiasɔ́bá ání itsú mv nyánsatɔ. ¹⁴Táme ní olu pú ɔnsípe tsiátɔ́
bu mutɔ́ á, múmú ɔmápv ibi sí kántɔ́, blí ɔbée mvbu nyánsa.
Ní ɔblí alɔ á, alawá afunu dínká ɔnɔkwali amusu. ¹⁵Nyánsa
ánfɔ odu motsú ɔsúsú. Itsú ɔyítɔ́ atɔ́ ɔmagyáa, tsiátɔ́ laláhe,
pú ɔɲe laláhe wá. ¹⁶Tsúfé ɔtínegyíɔ́tíne ání olu pú ɔnsípe
bu a, aba asumánú pú laláhebwe tetsiá unu. ¹⁷Táme ɔhá ání
mv nyánsa itsú ɔsúsú á, gyankpav, mv iwɔ letun. Ololwií,
ɔtɔ́dwé ahá, ɔteba iwiasɔ́. Otowun ahá nwe, ɔtɔ́bwé yilé.

Ɔtamafúti futáto ki, Ɔtɔbwé ató tsú mu kluntɔ. ¹⁸Ahá nsiné Ɔlapú todú iwilwiiá itɔpú yilébwe ba.

Ɔyító Ató Dwe

4 ¹Ntɔ tétí ikó múa utré wá mli nsiné? Megyí Ɔwólí laláhe ání ideklé igyi mliɔ tɔpúba? ²Mliɔlapú Ɔnsípe mliɔdé ató klé, mliɔmédé mú nya. Íni su mliɔdé ahá mɔ. Mli ansí depe ahá atósú. Mú sù mliɔdétré kó ní, táme mli ibi méeda mú ki. Tóá svá mliɔményá gyí, mliɔtamakúli Bulu Ɔha mli. ³Ní mliɔkúli kúráá á, Ɔtamahá mli, tsúfé agywun laláhe mliɔtɔpúkúli mu. Alíá mliɔpɔwá iwí ansigyí su mliɔdé mu kulí. ⁴Mliɔladámlí Ɔma há Bulu. Mliɔméyín ání ní mliɔdé Ɔyító ató dwe á, mliɔdé Bulu lu? Ní fudeklé fée fódwe Ɔyító ató á, futɔbwé Bulu olupú. ⁵Ntéé mliɔdékú mliɔaa, kpaali Bulu asun wanlínhé amu ileblí Ɔbéé, “Bulu tamatsúlá Ɔɔhé ámúb Ɔɔpɔwá anitɔ ámɔsu?” ⁶Íni sù Ɔtɔpú awitɔle tsɔtsɔtsɔ kpá aní, fé alíá Bulu asun wanlínhé amu ileblí ní. Ɔbéé,

“Ɔtɔkósú líí iwí atsupósú,

táme Ɔtɔpú awitɔle kpá iwiasí abápu.”

⁷Mú su nde mli bláa mbée, mliɔbá iwiasí ha Bulu. Mliɔkɔsu lu Ɔbunsámsú, Ɔbésrí náti mli wá. ⁸Mliɔkpɔkpe manta Bulu, Bulu é Ɔbékpɔkpe manta mli. Lakpan abwepú, mliɔfwí ibi le lakpanbwetɔ. Ahá ání mli agywun igyi anyɔ, mliha mli kluntɔ itun. ⁹Mliɔsu, amliha mli iwí iwa mli nwe, mli lakpan su. Mli mósí idámlí isú, mli ansigyí imli péli. ¹⁰Mliɔba iwiasí Bulu ansító, méni obótsu mli fúá.

Aba Iwí Asún Blí

¹¹Apíó adwepú, mliɔmátrá blí mli aba iwí asún. Mliɔmátrá tsii aba, kpóí aba. ƆhagyíƆha ání Ɔlele mu ba ilá ntée gyi mu asún á, ilosuná ání Ɔdeblí Ɔbéé, Bulu mbla ámu ima ale. Íni désuná ání alatsú mu iwí ání Ɔɔvun mbla ámu. Ní Ɔɔvun mbla ámu a, múmú Ɔmedé Bulu mbla ámu bu. ¹²Bulu lówa mbla ámu. Mu pé Ɔbétalí pú mú gyi aní asún. Mu pé Ɔbétalí hɔ aní nkpa, ntée mó aní. Ní igyi alí mú á, fúgyí ma ání fégyi fú bá asún?

Ansí Pvdínká Ɖkesu

¹³Mliya asu amlnu. Mli ahá ámbú mltēblí mltāa, “Nde ntée ɔke abóyɔ wúlu yilé kusv, yétsiá unv ofi ɔkulē gyi ibiá nyá iwí” ámv. ¹⁴Mbéé, mliyin ɔketɔ? Mliyin alíá mli nkpatasiátɔ bóbwe? Mligyí fé agyinde, utedáli dinká, táme utamawá ɔpá kuku, itɔfwí. ¹⁵Mú sv tśá ilehián ání mléblí gyí, “Ní Bulu lótsulá há aní nkpa á, abóbwe ínī ntée ínī.” ¹⁶Ní imegyí alí á, ilosuná ání mlidé iwí tsu, pú ibi sí kántɔ. Lakpan iwitsú ánfí odu gyí.

¹⁷Mú sv ɔhá ání oyin itɔ wankláán, táme ɔtamabwé á, ɔde lakpan bwe.

Iwí Anyapú Asún

5 ¹Iwí anyapú, mli sv amlsvra okitikíti, tsúfé ipian kpɔnkpɔnti íbá mli sv. ²Séi ánfí á, mli atonyahé féé laplú. Atéple bawí mli atati. ³Mli sika atɔ é ilakpóí, wí nkanv. Mú nkanv ámv obégyi mli iwí adánsiē, yíntá mli ɔyulúv fé alíá ogyá teyíntá atɔ. Mlilakle atɔ tsɔtsɔɔtsɔ yáí kpaali, bré ánfí ɔyí íbá ɔmɔ ɔnɔ ánfí. ⁴Mlikaun ání ahá ámbú mlíśbɔ ipa, bɔyɔ agyú má mli ndɔɔ, táme mlilékiná amú ikɔ ka ámv isú latú Bulu, túmi féé Owíe amv. ⁵Mlilatsiá ɔsulúv anfv sv, gyi nkpa múa ɔdwe púwá nfv fé nnantswie há mli ɔmɔké. ⁶Mlilahá ɔhá ání mv asún da ɔkpa ipón, mɔ mv, ɔmeprí iwí.

Uklunya Múa Mpáibɔ

⁷Apíó aba, mlunya klun tsia gyo aní Wíe Yesu Kristo íbá. Mliki alíá ɔdɔɔpɔ tenyá klun tsíá gyo nyankpɔ gyankpɔpɔ múa tráhe, pú alíá otetsiá gyo bréá ɔsulúv amv íbéha atɔ pɔpwe bówie wóyí. ⁸⁻⁹Mli é mlunya klun amlulu kínkín, tsúfé aní Wíe, ogyi asún ogyípú amv íbá lafun. Mú sv mlumátsiá tśí mli abasv, méni ɔméeha mli ipón.

¹⁰Apíó, mli sv Bulu ɔnɔsú atɔípú amú beblí Bulu asún ámv bwe mli atosuanhe. Bowun asún tsɔtsɔɔtsɔ, táme benya klun. ¹¹Mliki alíá anitobú amú. Itsú alíá botomi amú asun wunhetɔ sv. Mlikaun Hiob é iwí asúnsú. Alíá olotomi mv

asun wunheto. Inu su Bulu lóyulá mu mú oma. Lélé, Bulu bu awitole. Otowun ahá nwe.

¹²Mí apíó, ndeklé mbéé mlibú wankláán ání mímátánu ɔsúsú ntée ɔsulú, ntée ká tɔtɔtɔ. Mli “Iin!” ibwée “Iin!” mli “Ó-o!” é ibwée “Ó-o!” méni Bulu méeha mli pón.

¹³Ní ɔku dé ipian wúun mlitɔ á, okókoli Bulu. Ní ansí de ɔku gyí é á, ɔwáa ulu kanfu Bulu. ¹⁴Ní ɔku délɔ mlitɔ á, ɔtí ɔpasua ahande abuba bokókoli Bulu, abukpa mu ofobí anu Wíe idátɔ. ¹⁵Ní bokókoli anu Wíe hógyitɔ á, ɔbétsa mu ulu, ɔbókusú. Ní alabwé lakpan ku á, Bulu obési mú fée kíé mu. ¹⁶Mú ali su mlile mli lakpan bli, amlikokoli Bulu ha aba, méni ɔbétsa mli ulu. ɔhá ání mu asún da ɔkpa mpái tɔwá ogyá. Itɔyɔ agyómá wankláán. ¹⁷Nyankpusa *Elia é gyí fé mía funyo. Olokokóli Bulu kínkíínkín ání nyankpu mátswie. Lélé imotswie nfinsa múa ifun. ¹⁸ɔlélakólí mu ání itswie. Lélé nyankpu létií, ulaha atɔ lelawa alé ɔsulú.

¹⁹Mí apíó, ní mlitɔ ɔku ɔdida hógyitɔ á, ɔku ɔsánkia mu ba. ²⁰Mlibi ání ɔhá ámu lalé ɔkláa tsú lowu ání teku obówutɔ. Mú su Bulu obési mu lakpan tsɔtsɔtsɔ kíé mu.